

阿文成公年譜

阿文成公年譜卷十四

受業

王昶勘定

盧蔭溥增脩

第三孫那彥成恭纂

乾隆四十年乙未五十九歲

正月初七日

公偕豐昇額色布騰巴爾珠爾海蘭察額森特奏  
言查賊番因大兵深入巢穴將傾故自榮噶爾博  
山梁以至沿河各處無不竭力死守自宜於相近  
賊巢處所乘間進攻以亂其心而分其力查遜克

爾宗之南地名什爾德其山梁近西苗則大海之  
下有山腿兩支下山一爲拉枯喇嘛寺一爲已穢  
賊目桑結塔爾寨落該處山險雪深且與大營相  
距甚遠賊或不復多爲備禦則潛師往襲可期得  
手一得其地亦可進搗勒烏圍賊又抽撥多人往  
彼抵禦則於康薩爾及沿河一帶備禦稍疎可以  
相機攻進隨抽撥漢土官兵於十二月二十一日  
由達爾扎克繞過羅博瓦山後至喇穆喇穆相近  
處暫爲歇息二十三日酉刻官兵由薩斯嘉赤溝  
繞進苗則大海向南山腿之下分爲二股令普爾

普瑚尼爾圖等分領一上攻菑則大海後面四處  
礮柵一順什爾德山梁前進攻搶菑則大海正礮  
又酌分兩隊五岱等從山梁之右進攻并邀截遜  
克爾宗賊衆來援之路福康安從山梁之左進攻  
并爲接應薩斯嘉赤溝官兵之用臣豐昇額親往  
調度至戌刻風雪忽作是處山溝數十里步步崎  
嶇官兵從林箐中攀援跳躍而行二十四日辰刻  
抵菑則大海向南山腿之下二股官兵直上攻撲  
先將中間一柵攻克柵內賊番十數人均被殺死  
其餘三處礮卡賊番尙在堅守至山梁上兩隊官

兵同時進撲賊番出礮衝突五岱所帶滿兵鎗箭齊發殲斃十餘人餘仍入礮抵禦其緊對大營之康薩爾山腿上第一礮座與官兵所拏木柵相去甚近業已不拘日夜放礮擊打茲又於二十四日丑刻派令烏什哈達等從正面山脊進攻我兵撲至賊寨見寨外兩重濠溝設有兩重鹿角烏什哈達等督兵進攻先將鹿角砍開越過一重濠溝賊人鎗礮石砲交下官兵卽用鎗箭擊射共見傷斃賊番跌落寨牆之內時因令官兵暫撤卽在近礮林箐內放鎗吶喊時作進撲之狀賊恐官兵再進

仍於牆內暗行預備臣阿桂色布騰巴爾珠爾遂

督官兵乘此時施放大礮見牆內賊番有隨礮衝

去者計傷斃亦復不少其桑格噶斯瑪特山腿之

下臣海蘭察臣額森特於二十一日晚間先令土

兵於附近甲爾納寨旁潛行設伏而令彰靄等分

兵三隊進攻二十二日寅刻伏兵先上攻獲寨前

石卡三隊官兵齊進卡內逸出賊番俱行殲斃乘

勢進撲碉寨而賊番鎗石已如雨下官兵連撲數

次不能久立是以酌撤臣等以此攻打之後賊番

度我兵應稍休息更可出其不意又於二十日寅

刻派額爾特攻甲爾納左邊之來珠寨

臣

額森特

從中下壓但是處距營盤稍遠逆料賊必繞截我兵之後並派侍衛達蘭泰等於左邊溝內設伏以便截殺及至官兵抵寨奮攻對面山梁果有賊人抄下達蘭泰伏兵突起箭斃數賊餘多負傷奔竄而寨內賊番鎗箭益緊因亦將兵暫撤先是十九日戌刻有賊番五十餘名分爲兩股於甘肅官兵卡旁潛越而上守卡外委張可宣率兵迎擊立斃數賊而總兵保寧遊擊柯藩又已聞聲往援分爲兩翼從石卡左右壓下賊不能支卽行敗竄帶傷

扶掖而去者頗多又臣飭令丹巴士兵於二十一  
日往搶沿河賊卡亦殺死兩賊奮力攻擊良久始  
回合計數日內打仗殺賊不少弁兵間有陣亡受  
傷者統俟查明報部奏入

諭曰此次官兵進攻殺賊頗爲不少賊衆自必胆寒若能  
攻克得式梯寨則進剿勒烏圍自然勢如破竹阿桂等  
及此天晴雪少之時務須上緊籌辦勿遲至二三月間  
雨雪甚時致有稽阻但亦不可不審度利害冒險撲礮  
惟當妥酌行之至於官兵分路進攻均距賊巢不遠而  
阿桂一路尤爲得力現在賊番雖間有潛出滋擾之事



我兵各處嚴爲防範可不致有疎虞卽或賊番死守官  
兵未能迅入諒賊勢不過數月自必滅亡今事屆垂成  
萬無中止之理國家帑藏充盈軍需之用寬裕有餘計  
兩次撥銀九百萬兩現已陸續到川約可用至四五月  
內設再需用五六百萬方能蕪事亦所不惜想阿桂等  
必能深體朕意斷不稍存畏難作輟之見但應將此意  
令滿漢官兵及土司土練等一體聞知俾堅其心於事  
更爲有益

十五日

公偕豐昇額色布騰巴爾珠爾海蘭察額森特奏

言本月二十九日<sub>臣</sub>等以現當除夕賊度大兵未  
必更來打仗出其不意於申刻令烏什哈達帶兵  
突進果見各處賊番奔至礮前放鎗拋石烏什哈  
達令官兵暫伏林箐<sub>臣</sub>等已先將各種礮臺排列  
並令兵丁舉鎗以待至時一齊點放見擊倒轟去  
之賊甚多至正月初一日戌刻復有賊八九十人  
來搶格爾提頭二卡座卡兵迎敵卽行逃遁叅領  
常存等察知賊係佯爲退避當卽設伏以備截殺  
初二日子刻賊果分路來攻伏兵齊起鎗箭並發  
賊多被傷頭躓扶掖逃竄查賊番等或爲官兵進

攻時所戮或於偷來滋擾時被戮又每日有爲大  
礮所擊者既已日形其少而窮餓之人又復紛紛  
逃出其力量日單以情勢度之斷不能久爲支拒  
奏入

諭曰賊人因巢穴已近捨死力衛亦理所應有官兵雖急  
切未能得手亦應隨時設法進攻擊其虛懈以期有濟  
斷不稍涉因循觀望坐守相持久稽時日阿桂練習軍  
務且長於謀畫自必悉心籌度迅奏膚功惟望其努力  
妥爲之

二十二日

公偕豐昇額色布騰巴爾珠爾海蘭察額森特奏  
言康薩爾一碉已經大礮轟摧已多塌燬自應於  
此進攻當於初五日派令烏什哈達海祿帶兵攻  
撲賊番於碉卡之外挖有兩道濠溝且設兩層鹿  
角官兵隨卽砍開跳濠搶進直抵碉根奮迅攻擊  
其露身碉前之賊既多被鎗箭擊斃賊惟藏於空  
穴之中施放箭石不遺餘力因令官兵畧撤據投  
出番人供稱是日碉內傷斃之賊共有三十餘人  
至此數日賊番屢來侵擾每次俱被殲戮且一經  
官兵衝擊卽行敗逃其爲驅逼而來並非齊心抗

拒已可概見並近有投出之番人及脫出之拔摩  
等處各番人妥爲分別安插謹錄供詞恭呈

御覽奏入

諭曰此次攻打康薩爾第一碉座官兵等頗屬奮勇至番  
地氣候冬令多晴入春即多雨雪朕屢促將軍等上緊  
籌辦原慮因此或有阻滯耳今甫交春令即已大雪恐  
愈遲愈多不可不早爲之計况雨雪雖云凍滑前此攻  
勦各處碉座於雪中雪後得勝者甚多可見事在人爲  
阿桂等不宜以雨雪爲辭稍存自畫之見至康薩爾及  
沿河一帶地方賊番因逼近窺巢捨死堅守實堪切齒

但閱城以出番人克思嘉等供詞稱賊人糧食只有苦蕒  
圓根共窘可知並稱火藥將次用完土司吩咐頭人每  
家要交一劬硝二兩礮等語如此豈能經久著傳諭阿  
桂等卽當上緊籌度設法竭力進攻以期迅速蕩事

二十六日

公偕豐昇額色布騰巴爾珠爾海蘭察額森特奏  
言賊酋於康薩爾一處守禦不遺餘力臣等派侍  
衛佛倫泰等分路進攻均於十二日寅刻奮迅直  
進刀斧手各兵先拽開攔道樹木並拔起鹿角躍  
過重濠又往上拋擲火彈賊番盡力抵禦而緊隨

之鎗箭官兵先已放鎗注矢以待凡有露身滾放鎗石之賊立時擊射賊番傷死漸多正在邊巡之際三面官兵一呼而上躍登礮頂將石板遮蓋之地窖同時踏塌其在礮內外之賊均已殺戮窖內及溝中之賊或被火彈燒斃或被所塌土石壓死此礮共有賊番一百數十名負傷逃去者甚少礮卡木城全行克獲察看窖內西北有地穴一道六頂用木板上托旁用大木撐柱頗爲寬大步行無煩僣僂係潛與第二礮卡相通之路現因第二礮卡賊番尙在固守遂用木植石塊將地穴填塞卽

於第一礮卡地方拏卡佔住至第二三賊礮其外皆護以木城而第二礮之外又築有石卡接應因令侍衛庫爾德從正面進攻烏什哈達等又從左手截其來援之路攻至巳刻又將礮座木城石卡陸續攻克復進取第三大礮攻至戌刻一面直撲礮根拋入火彈一面復派官兵兩翼衝下賊恐圍住在內倉皇四出我兵追殺被殲之外餘多受傷竄走又將第三大礮及木城佔住看得第三礮卡其下尙有寨落賊衆聚集踞守但相距稍遠且山脊兩傍皆係密箐若黑夜進攻難以接續隨令官



兵於適中之地趕拏木柵且運礮轟摧至十三日  
黎明進攻賊番雖亦抵死相持而我兵勇氣倍增  
四面環攻寨落三處大礮一座石卡七座同時攻  
克并殺賊三十餘人至此下尙有寨落礮卡復用  
礮擊打十四日黎明督兵進攻並派兵截其後路  
我兵將抵礮前賊已驚慌敗遁康薩爾山梁盡處  
皆係懸崖賊番無路可逃從懸崖跳下跌斃者甚  
多其寨落三處大礮五座石卡八座又均佔據此  
三日內已將康薩爾山梁掃盡並將山溝內水礮  
寨落一齊搶佔亦有殺戮至官兵內惟索倫佐領

兼輕車都尉巴西薩陣亡其二等侍衛庫爾德九員雖受鎗石諸傷俱無妨碍所有陣亡及受傷官兵容俟查明另行咨部查滿漢屯土各兵本爲奮勵此次更屬勇銳異常凡貿易之民人運糧之夫役無不嘖嘖稱羨臣等伏思此十二三日恭遇

皇上親詣齋宮

南郊告祭之時仰惟

至誠默禱上邀

靈佑是以士氣飛騰若有神助如此大寨堅礮得以迎刃而下查此處本係進取噶爾丹寺及噶朗噶勒烏

圍正路而其前勒吉爾博山腿形勢延長賊番碉  
卡雖多未必能處處防守嚴密若稍遲時日賊酋  
又必增修碉座攻取轉爲費手臣等察看情形擬  
即在兩三日內迅速督攻以期搗穴奏入

諭曰邇日盼望軍報甚切而各路將軍連次所奏俱未得  
手煩悶實甚覽此深爲欣慰康薩爾爲賊番第一要隘  
今既將該處山梁盡行攻克是官兵已得勝勢更可乘  
銳深入此實仰賴

上并嘉佑阿桂等尤當努力奮勉速成大功將軍等此次  
調度有方幸獲大勝甚爲可嘉俟攻得勒烏圍時再行

優敘所有陣亡之巴西薩甚爲可惜著與受傷之侍衛  
庫爾德等及陣亡弁兵一併查明咨部照例卹賞其庫  
爾德所受各傷俱曾全愈否亦著阿桂遇便覆奏

恭錄

御製詩

將軍阿桂奏報攻克康薩爾山梁礪卡木城詩以誌

事

自克默格爾山梁滿擬卽遣平賊信

阿桂於昨歲十月內  
攻克默格爾山梁其

地距勒烏圍不過二十餘里侵尋待之逾兩月密拉噶拉  
計搗穴擒渠可以剋期蕪事  
兵仍頑賊因距巢甚近死守益堅阿桂自默格爾山梁得  
勝卽駐兵密拉噶拉木已兩月餘雖攻得日爾

巴當噶凱立葉等礮寨而得式梯一帶屢攻不下仍  
未能直進密拉噶拉木急呼之則爲密拉噶拉  
蓋緣

已扼賊門戶因以死守防益慎彼處跬步無非山石劍鬻

叢允難進於康薩爾築礮寨弗遺餘力據險峻嘉哉我將

及吏卒敵愾同志衆積恨拔彼鹿角越彼濠直抵礮根登

奮迅堅壘深窖一時摧大鞬大膊不遺愁賊以勒爾策依

不易因於康薩爾山梁多築礮卡守拒不遺餘力阿桂遂

派兵三除泰斐英阿等攻其前珊尼爾圖烏什哈達等左

右夾擊福康安等在後策應正月十二日寅刻各路潛進

拔其鹿角躍過重濠至第一礮根向上拋擲火彈賊人鎗

石雨集抵拒益急我兵舉鎗注矢以待賊有露身礮外者

卽擊射殪之官軍遂一呼而上躍登礮頂其礮內外地害  
獲以石板爲我兵踰躡賊多有壓斃其下者尋卽攻克此  
礮察其下有穴潛通第二礮卽以石填塞是日已刻復得  
第二礮戍刻又克其第三礮賊人除殲戮外餘皆負傷而  
暹十三十四兩日並將其下各處寨落盡行攻取是役也

計克大礮十木城四石卡二十寨落七捉生二殺賊二百餘獲銅礮二鳥鎗刀矛楛杷無算康薩爾山梁悉行勦平三日殲賊二百餘遂奪山梁高萬仞石礮凡十木城四近

礮寨卡全收盡

叶

齊心努力悅以憐普賚特擢夫豈靳

將

奮勇得勝其志足嘉因賞在事兵丁一月錢糧其將弁中勇銳超羣者經將軍保奏優擢陞等賞翎賞巴圖魯號有差將軍參贊領隊等則俟攻得勒烏圍交部優叙勒爾策依籌卽搗迅雷不及掩耳震譬如竹破已裂節其解自當速迎刃

阿桂等奏勒爾策依山形綿亘防守

不能盡嚴擬於兩三日內迅速督攻使賊人措手不及以期進搗其巢

事半功倍豈期然爲

山九仞懼尤甚

叶

佇候紅旗報大捷竭誠惟籲

天

助順

康薩爾之險倍於他處賊之守禦亦較他處爲堅乃官兵得之如不甚費力者實賴

上天嘉佑

阿桂奏謂此數日適當上辛詣

壇親祀之辰由

於誠禱所格不知予之默籲固無一日不然也

二月朔一日

公偕豐昇額色布騰巴爾珠爾海蘭察額森特奏  
言甲爾納西南有堪布卓寨若得其處則甲爾納  
附近寨落截在官兵之後無難一律掃除因議派  
健銳火器兩營滿兵分爲兩翼潛進合圍並令正  
路攻弼之兵攜梯前往爲奮迅登弼之用十六日  
子刻進發左右兩翼滿兵潛密無聲分頭抄進比  
及合圍當卽以拋擲火彈爲號正路官兵一齊下  
壓賊番雖已知覺鎗石如雨而我兵從鎗石叢中  
豎梯而上據弼房之頂賊番竄走無路均爲刀箭

所斃其伏匿寨中者又爲火彈燒死及官兵踏蹋  
礮房所壓約計五十餘人無一得脫者當從我兵  
前卡直至堪布卓拏柵防守至十七日丑刻復整  
兵進攻甲爾納寨該處賊番已被官兵截斷正用  
皮船偷渡官兵追擊均經落水淹斃又將甲爾納  
寨後堅礮一併攻克其沿河崖洞內賊番俱搜出  
誅死共計殺賊百餘名我官兵內惟副將烏爾納  
委署叅領七十五爲鎗石所傷均無妨碍其遜克  
爾宗之兵臣等於是日令普爾普等設法進勦勒  
吉爾博賊寨亦於十七日子刻冒雪潛進攻擊所



阿... 卷... 三  
殪之賊更復不少而索倫佐領伊爾賽因直前攻  
撲以致傷亡委署叅領德海都司梁朝桂亦因奮  
勇先登均得鎗傷

公又偕豐昇額色布騰巴爾珠爾奏言臣等於二

月十六日夜有番人郎木太從金川投出臣等嚴

加詰訊據供稱賊人欲於康薩爾日爾巴當噶甲  
爾納等處偷截後路以伊本係鄂克什人官兵必  
不動疑探知官兵多少以便下手又供要截官兵  
後路之語是土司分付當噶拉阿納木令其出來  
散播使官兵專顧後路則前面攻打之處或可稍

疎查大兵進討本爲金川賊曾黨助小金川攻圍  
鄂克什而發今該番以鄂克什人乃轉甘爲賊曾  
使用偵探大兵信息種種狡譎實堪痛恨除飛札  
富勒渾常青旺保祿等嚴密防範外將郎木太卽  
行正法

公又奏言查宜喜山梁與西路大營相對臣每日  
詳加審度形勢若添兵力越溝截出其後斷無不  
能摧破臣思南路官兵共有一萬三四千今以卡  
卡角馬尼兩寨之故而使如許兵力株守是我欲  
牽綴賊番轉爲賊番所綴實屬非計且宜喜日旁

又以兵力既分不能籌辦是此兩路三萬餘兵均  
爲無用之兵尤爲可惜臣再四圖維南路官兵若  
爲進取之計則此現有之數原不爲多若僅爲牽  
綴之計則雖抽出一半亦不爲少卽如凱立葉一  
路自豐昇額來西路之後僅存兵四千餘名宜喜  
自明亮移駐日旁後僅存兵三四千名而五岱馬  
彪在彼統領並無疎失况南路河北之馬尼河南  
之深嘉卜本屬巴旺布拉克底舊地今不過添助  
官兵足資防禦是以前年河北之臨卡等處臣僅  
派兵數百名往駐從未見有賊番滋擾而章谷一

處本在明正土司境內更無藉於多兵至前次劉秉恬奏稱霍爾章谷土司之女已爲賊酋土婦輒慮賊酋將來力極勢窮從此竄走但以愚見度之現據郎木太供稱莎羅奔兄弟斷不敢逃往各土司地方官兵圍住噶拉依時卽爲焚斃之計臣正恐賊酋情急自戕不能生致若從此竄走則革布什咱本與金川深讎霍爾章谷土司亦深知畏法現遣其頭目來營稟訴並不敢視爲親戚則逃往轉無難於弋獲臣於此時可以深信統計富德處一萬三千餘兵內實可抽出六千名其餘剩七千

餘名分撥於緊要卡隘已無不足其章谷吉地一帶若抽出兵丁一千名於駐防之制亦尙充裕統計抽出官兵七千人合以宜喜日旁原有之兵已得戰兵萬餘宜喜山梁自無難於摧破而宜喜之兵下至河沿則日旁一帶之賊截住在內而臣一路亦可直破勒烏圍勒烏圍破而噶拉依亦不能守卽或賊番尙思退守噶拉依則此項兵丁循河西南再攻正地一得正地再合攻庚額特仍可以爲南路之用而臣一路官兵直搗噶拉依更可收夾攻之效似成功較爲迅速均奏入

諭曰阿桂等奏攻克甲爾納堪布卓沿河各碉寨情形甚屬奮勉可嘉據稱豎梯而上想係所帶雲梯卽此可見平時演習之效其先登者爲誰著卽查明據實具奏以便加恩示獎此兩處攻得已至河沿一帶官兵汲飲有資卽可乘勝直取得式梯進剿勒烏圍其勒吉爾博山梁碉卡若能相機攻得於進取更爲有益至已攻得甲爾納對河卽係斯牟木咱爾與明亮軍營更近阿桂等固可隔河用礮轟摧明亮等亦可約會就近設法夾攻若能併力攻得斯牟木咱爾於進攻勒烏圍尤爲得力至所稱攻碉時索倫佐領伊爾賽因攻撲傷亡甚爲可

惜其都司梁朝桂等先登受傷亦屬可憫並交阿桂等將陣亡受傷弁兵一併查明咨部議卹至盤獲奸細耶木太必係阿桂窺破其狡譎情形逐一嚴訊方能得實他人並不能如此用心阿桂既辦及此則各處投出之人將軍參贊等不可不畱心體察如有形跡可疑者卽當嚴詰得實勿爲賊番所愚至阿桂另摺所奏議調南路等處兵七千名會攻宜喜山梁所見甚是與朕前次所降諭旨適合緘布一帶現雖駐兵牽綴賊勢但明亮西路之兵若能攻進卽可由馬爾邦一路夾攻取勝引進南路之兵同勦噶拉依惟其地甚關緊要亦須勇幹

大員統兵駐守富德自不便輕離該處著傳諭富德卽速酌量抽撥

恭錄

御製詩

獲諜有序

阿桂旣克康薩爾卽乘勝進剿堪布卓甲爾納賊寨數日復全克之初發兵之夜有番人來投訊其名爲郎木太云是鄂克什人二十餘年前逃往促浸者聞大兵攻剿嚴急故至此探路欲率番投降降耳阿桂以彼在促浸久地形皆所熟悉何待再探且察其神色



有異嚴訊之不復能隱知爲促浸頭人當噶拉阿納  
木遣其叩營詐降以潛伺我兵虛實及進攻路徑廐  
牧遠近卽合遁歸以告爲抵拒掩襲計阿桂旣得情  
斬郎木太以徇並札致各路督兵攻勦防守諸臣胥  
畱意毋忽阿桂此舉可謂得行軍機要矣邇來賊中  
投出之番不一而足從未有如此察詰者誠僞固不  
可知然過疑沮遷善之途而過信恐墮狙譎之術自  
非明智有識者未易臻此善夫李靖之言曰孫子用  
間最爲下策譬之水能載舟亦能覆舟然靖第知用  
間之難若察間之難則未之及也予旣嘉阿桂之能

發奸因成是篇以闢之

兵法所貴者知我知彼耳知我猶覺易知彼斯難矣彼我互主賓我乃彼之彼彼用間諜來蓋欲知我已誠投與詐投是在精心揣誠投我撫之或得彼端委詐投乃奸細窺我告彼駛將軍審獲之允協用兵理復克其兩處

阿桂於

薩爾後復得堪布卓甲爾納兩賊寨斬獲亦眾且已

攻克康

至河岸官兵汲飲甚便即可乘勝采入迅速告成

入已采

叶

師貞賴助順鴻捷計日指

初八日

公偕豐昇額色布騰巴爾珠爾海蘭察額森特奏  
言查堪布卓西南小山腿尙有碉寨一所地名斯

莫思達攻克此處則官兵前進始無妨碍臣等先  
已圍其三面並將礮位轟摧正月二十四日派副  
都統額爾特等分爲兩翼進攻又派侍衛彰靄帶  
兵抄越賊番恐被圍截且戰且走官兵合力捨殺  
殲賊十餘名其餘竄至河邊被追緊急溺斃頗多  
當將沿河斯莫思達大礮一座木城一座石卡二  
座均行佔住奏入

諭曰阿桂等奏攻克沿河斯莫思達礮寨乘勝采入自屬  
更便阿桂等尤當設法妥速辦理佇聽捷音

恭錄

御製詩

仲春齋居

古社將臨祭深宮此致齋晝長日出早春暖雪消皆牆柳

穉籠院庭莎芽紐階誰云幾務簡籌筆正縈懷

阿桂奏至堪布卓西

南山脚上尚有礮寨必須攻克此處前進始無妨碍官兵先已圍其三面並移礮轟摧又分兵四路於二十四日半夜乘雪進攻賊已知覺抵禦尋恐被截在內一面出礮抗拒一面逃竄官兵鎗箭齊施斃十餘賊餘俱竄至河邊落水淹斃者甚多因得其大礮一石卡二其沿河六寨賊人雖步步退守尚須節節力攻然以形勢度之必能次第攻佔隨即指示機宜郵

發益盼捷音適至

十五日

公偕豐昇額色布騰巴爾珠爾海蘭察額森特奏

言查沿河尚有碉寨六處與得式梯官寨相隔格魯克古溪河一道必須先爲攻取其六處內惟察庸及羣尼兩碉最爲高大羣尼碉礮下又有寨落一座均爲從斯莫思達前進所必經兩日以來碉寨爲大礮所轟間有坍塌自應亟圖攻克其遜克爾宗亦應同時攻打使賊番左支右絀當於二月初三日臣色布騰巴爾珠爾臣額森特派令侍衛巴三泰攻取羣尼各碉寨詎賊番偵候甚嚴覺有官兵來撲旋即放鎗滾石而遊擊靈山等直抵寨下砍門躍牆鎗箭齊施刀矛短接殺傷甚衆其驚

惶竄出之賊又被官兵緊趕殲戮頗多當將寨落  
奪獲至臣豐昇額先於康薩爾大營挑帶精銳三  
百名前抵遜克爾宗相對營盤派合成德等分爲  
三隊進攻初四日巳刻一擁直前壕內礮內之賊  
死力迎拒官兵相持良久西北一帶之賊分頭來  
援雖有殺傷久攻無益因將官兵酌撤此次打仗  
副將佛遜中礮陣亡巴圖魯章京興奎藍翎侍衛  
訥松額委署叅領達什總兵索明遊擊唐達先受  
傷均無妨碍

公又奏言臣查各路官兵幾同株守自不得不加

增兵力竊思各省綠營節次調撥爲數已多但赴營日久其中陣亡病故以及傷病遣回並在逃者亦復不少卽如西路內所調四起貴州兵丁共有九千今畱防後路之黔兵祇存三千三四百較之原來之數幾去三分之二以貴州一省例之則他省官兵亦必如此而以西路一路例之則各路官兵短少之處亦必相同是以計原調之數實覺其多而核計現在之數則已懸殊查此種兵丁內除在逃未出以及傷病遣回懸缺未補外其陣亡病故所遺之缺凡本無餘丁及餘丁補完者皆咨回

本省募補卽傷病遣回之兵其身故者既在本省  
補缺卽傷病痊愈者亦仍在本省當差約計各省  
此次兵丁共有一萬數千名今除四川一省已商  
同富勒渾等於中挑選三千名料理來營其隣近  
之陝甘貴州三省亦可共挑出六千名令赴川省  
軍營緣營官兵在途行走除例給人夫擡送軍裝  
外其餘並無繁費及抵軍營統計添兵一萬每月  
所需口糧鹽菜不過五六萬兩而合計現在每月  
各路兵夫所需不下百萬如添此兵力早完一兩  
月之局則於帑項軍需較可多爲節省况此附近



四川各省程途俱近迅速進行不過四月內均可  
到營屆時大功告成則此地平定之後原須留兵  
駐守即可將出兵日久之兵撤回本省而令新到  
之兵分撥防守若屆時尙有未盡掃除之處則視  
何路兵數不敷卽行增添或另爲一路攻剿於迅  
速成功之局更有把握

公偕豐昇額色布騰巴爾珠爾又奏言查番地重  
山複嶺在在皆然以大勢而論則自日爾巴當噶  
陡烏當噶以至沿河已屬自高而下其實支派縱  
橫一大山之左右輒有山腿數道而一山腿左右

又各有小山腿數道賊番總在峯巒突起之處築  
礮守卡竭力拒守官兵前往攻打仍須自高而下  
又自下仰攻卽現在沿河地方地勢較平而自堪  
布卓而南如得式梯寨噶爾丹寺皆在高阜之山  
且番人因山爲田田墾之高下輒有數尺及數丈  
不等兵丁攀躋跳越並非從高下壓其勢一順者  
可比是以臣等遇有可以繞越之處卽行發兵繞  
進者職此之故今揆度賊情實爲窘迫如另從當  
噶功噶分兵進攻誠如

聖諭實屬出奇之一法但卽就當噶功噶木果木三路內

以<sub>臣</sub>等愚見揆之當噶爾拉山勢透迤自納木覺爾宗上山計至山嶺約有八九十里賊在小山高巔一經望見卽能預備且岡嶺延長斷非少兵所能佔據其木果木一帶山勢雖高而自崇德牛廠而進道路稍爲徑直若能乘虛而進賊必慌亂將來添兵分進似應於功噶爾拉一路爲宜<sub>臣</sub>等再四籌畫以前四川各鎮協兵丁調在各路者幾及二萬所遺糧缺移回內地募補者約有數千昨富勒渾來營<sub>臣</sub>等商定合其會同文綬查有實數將遺缺新募之兵畱於本地以供差使卽於舊存兵

丁及傷病已愈者挑其人材壯健技藝嫻熟三千人前來以備另路之用至後路各兵較之現在大營打仗之兵不無稍遜然究係屢經行陣之人自可抽調添用臣等現將後路可以裁減之處通盤籌畫并俟富勒渾文綏查明可得兵數若干料理起程屆時官兵攻進愈深賊番力量愈薄臣等卽將分路事宜一面辦理一面奏

聞

公又偕豐昇額色布騰巴爾珠爾奏言查明亮處官兵因帶石一條山脊形勢險窄賊番設卡剗溝

據守難於直入且兵力既分一時無從措手查宜  
喜山梁形勢正值西路大營對面臣等詳加審察  
若添兵數千不必攻撲大礮竟從山溝繞越直截  
賊後斷無不破之理而攻破之後順山腿而下賊  
更不能堵禦便可直至勒烏圍對河目今可以速  
行藏事之局無過於此今准富德抄送摺稿內稱  
南路各營卡及章谷後路止可抽兵三千之語去  
冬臣阿桂查據南路按察使李世傑報稱南路河  
南北共有滿漢屯土官兵一萬三千八百餘名何  
以現在可抽兵數僅止於此况臣等揆度南路打

仗情形若西路之兵一至噶拉依則南路一隅之賊必成瓦解此時南路僅爲駐守之計原無須於多兵今准明亮等覆札稱辦理此事非八九千兵不可而革布什咱土兵惟願在本地攻打既不能調出其宜喜日旁兩處俱只可抽撥千餘合以南路調來之三千兵卽能攻得碉卡未必能直至河邊等語是宜喜一路又難遽行辦理均奏入

諭曰阿桂等奏攻打沿河寨落及勒吉爾博遜克爾宗情形頗屬認真但俱未能得力甚爲焦急所有兩處攻打陣亡受傷官員兵丁並著查明照例咨部卹賞至另摺

所稱各省綠營應行補缺兵額共萬餘名請川省調撥三千並於陝甘貴州挑補六千赴川備用等語已飛諭各督撫迅速挑辦派員帶領遄程前往現在征剿金川一切調度惟阿桂是恃是以有所陳懇悉如所請允行今既准添此項兵丁則官兵聲勢倍盛凡在營士卒應益知鼓舞奮興而土兵見添兵攻剿尤爲滅金川之驗更可堅其效順之忱卽賊眾聞知自必更加驚恐潰散尤速今大功已屆垂成凡有益於進攻之事朕不肯稍爲憚煩惜費阿桂不可坐待此兵務宜速籌勝算迅奏膚功以舒朕宵旰懸念至三路攻剿之兵屢經攻奪險

要逼近賊巢其明亮舒常一路自攻克達爾圖山梁後  
總未能籌勦得利及駐兵帶石以來又將數月此路既  
不可進自應繞往達爾圖一路或宜喜一路另籌進攻  
似此遷延株守何時可望成功而富德一路擁兵不爲  
不多乃自上年四五月後半載有餘不過攻得尋常礮  
卡數座其餘河之南北如庚額特等處緊要地方均未  
能摧破若俱如此攻勦賊境何由得進且同係賊番礮  
卡何以阿桂統兵所至不論仰攻旁擊到處摧堅明亮  
舒常富德均著傳旨申飭阿桂前奏明亮一路約計需  
兵七千著富德處撥兵三千前往其吉地章谷亦可撥



兵一千又阿桂商令富勒渾等酌撥川省兵三千亦可  
令選赴明亮處應用明亮得此七千兵合伊所統兵內  
再挑數千即可滿萬豈有如此力量尙不能進攻之理  
明亮卽當仍遵前旨令舒常駐守帶石自行馳赴宜喜  
迅速進攻仍令將籌辦得勝情形迅速覆奏佇盼捷音

二十一日

公偕豐昇額色布騰巴爾珠爾海蘭察額森特奏  
言查勒吉爾博山梁中間向北有小山腿兩道冰  
雪已消若從此進攻得手向西卽可出得式梯之  
後與桑噶瑪特官兵兩面夾攻惟勒吉爾博山梁

至第一道山腿其上木城卡共有三十餘座因分  
派海祿佛倫泰岱森保福康安保寧特成額等分  
路進攻又令各官兵攜帶鋤鋤以便刨挖礮根又  
備梯子以供爬越上礮之用二月初七日丑刻各  
帶官兵前進拔開鹿角躍過濠溝均將火彈拋上  
礮頂並欲布梯而登其直抵礮根之下者已用鋤  
鏟刨成孔穴卽從孔穴之內擲入火彈賊番見勢  
危急將礮牆堆積石塊推滾而下木梯旣難安立  
而孔穴內所擲火彈僅能入礮下層賊番均在上  
層竭力抵禦藥力雖亦上達攻至辰刻未能攻克

因將官兵酌撤賊番間有出礪思圖衝壓者多被  
官兵傷斃遁走是日臣色布騰巴爾珠爾額森特  
進攻羣尼擦庸各礪寨亦因礪寨內賊番鎗石甚  
緊而礪旁山腿及河岸之賊合放鎗礮擊打久站  
無益因亦撤回另辦先是初四日寅刻賊番來擾  
護軍校德克精額營卡經德克精額率兵擊殺受  
創竄走又初七日子刻賊劫湖廣都司馬定鼐之  
卡馬定鼐帶領卡兵三十餘名奮力迎敵將賊番  
擊退而喇穆喇穆遊擊明安圖營卡又有賊二百  
餘人分路攻圍明安圖率兵鏖戰殲戮甚多賊不

能支始行敗遁同時副將豐盛阿營盤亦有賊百餘人直來圍攻該副將竭力迎擊賊番敗而復進連衝數次均被官兵殺退其遊擊巴達瑪圖所駐之卡是時亦有賊番滋擾官兵迎擊擒獲生口一名並奪獲器械等物比至天明察看各營卡外石邊草上鮮血淋漓併各處拖屍痕跡甚多計殲賊番不少奏入

諭曰阿桂等奏分攻勒吉爾博等處碉寨並痛殲喇穆喇穆偷劫營卡賊番情形將領官兵等可謂實力奮勉再能如此認真攻剿數次賊番殲戮愈多賊衆必惶懼難

支敗亡尤速閱所擒活口供詞賊中火藥無多糧食亦  
乏並選婦人穿男衣假充兵數其窘可知卽所云對衆  
人言圖刦官兵後路營盤搶些口糧火藥之語亦非捏  
飾並述其土司言官兵一到勒烏圍我們只好走到噶  
拉依官寨自己放火燒死這官寨就是我們墳墓等語  
固屬激勵番衆之詞而其窮蹙恐怖之情亦可概見賊  
番狡詭惟以遮截後路爲長技今護軍校德克精額都  
司馬定竄遊擊明安圖副將豐盛阿遊擊巴達瑪圖等  
各營卡均有賊衆潛來滋擾經官兵盡力勦殺不但不  
能得手且大吃虧其伎倆已無可施愈覺勢窮計竭攻

取尤爲易更宜及早圖之此五人均應獎賞至聞逆  
曾索諾木湊集番衆親帶至拉枯喇嘛寺等處以希圖  
僥倖於萬一固屬可恨但索諾木此時同其助惡頭人  
丹巴沃雜爾等前至勒烏圍一路卽充其力量亦何能  
爲自係逆酋等罪惡貫盈

上天隱奪其魄驅攝聚於一處以供官兵擒縛其來實係  
極好機會阿桂等卽當設法掩捕將逆酋及其弟兄頭  
人一併俘獲則成事尤爲迅速全完就各路情形而論  
惟阿桂一路專爲可恃朕亦惟於阿桂是賴阿桂務當  
努力籌辦速成大功以膺懋賞

二十八日

公偕豐昇額色布騰巴爾珠爾奏言

臣等欽奉

諭旨查詢查

臣

等因賊礮高大人力難攀是以製有長梯

或將獨木鑿爲層級或將木植紮成借勢騰踴而

上是以進攻官兵先攜梯以往及至礮根火器營

鳥鎗翎長穆克登布首先搶上被石擊墜仍復躍

起上礮而健銳營前鋒阿爾綳阿卽於穆克登布

墜下之時接續搶上均爲勇敢

臣

等於前另摺內

已請將此二員授爲額外前鋒校護軍校以示鼓

勵奏入報

聞

三月十三日

公偕豐昇額色布騰巴爾珠爾海蘭察額森特奏  
言<sub>臣</sub>等前於沿河羣尼等處令官兵連擊木柵三  
十餘座相近羣尼寨下並設礮臺三座移往各種  
礮位竭力攢轟礮寨亦漸坍塌<sub>臣</sub>等因令副都統  
瑚尼爾圖侍衛彰靄等添兵從左手循田塹進攻  
又派領隊大臣福康安副都統額爾特佛倫泰侍  
衛泰斐英阿等從右手進攻又派遊擊靈山等沿  
河進攻其總兵官達色侍衛那木札等攻打向南



來珠寨落以牽賊勢臣豐昇額親往督率臣海蘭

察額森特同總兵海祿侍衛格勒爾德等緊隨策

應當於二十五日卯刻進攻該處本係莊稼之地

易於刨挖是以賊人所掘濠溝較前更爲深濶官

兵正在設法過濠時而賊人業經知覺乘墉抗拒

鎗石如雨官兵鎗箭齊發將露處之賊擊斃賊又

卽於濠沿挖成鎗眼潛伏放鎗三隊官兵正擬相

機撲進維時來珠寨之賊聚集最多雖被官兵綴

擊而得式梯等處之賊見勢危急遂悉從寨後前

來捨死策應官兵上前迎擊殲賊不少賊隨敗竄

而河西之賊又用船過河同沿河各卡之賊合力  
前來接應雖經官兵分頭擊退而礮內及濠溝之  
賊擲石放鎗愈加緊密久站多傷因將各兵酌撤  
查賊因官兵一抵得式梯寨一面攻圍一面即可  
前進故於此守禦幾於無隙可乘但相度形勢因  
右手田壩之上有大戰礮一座遇我兵進攻賊即  
乘高放鎗撓我進攻之力必將此礮用礮轟毀則  
羣尼各寨始易克取此三四日又督令官兵於右  
手進擊木柵五座相距大礮更近移礮晝夜轟擊  
俟其頽墮突然攻撲賊人應援不及必能得手至

木思工噶克山梁各處碉卡木城互爲聯絡惟向西迤下三處有拉爾甲一處碉卡稍稀若出其不意直前攻奪則可截佔木思工噶克得式梯中道並可進取噶爾丹寺等處

公偕豐昇額色布騰巴爾珠爾又奏言據富德咨稱現已於馬柰吉地等處派出兵二千七百五十名計三月初一二等日可以全抵宜喜查宜喜添此南路之兵原可卽行攻打但達爾圖山腿綿長如兵力不敷未能一面繞截賊人之後一面乘其慌亂佔住險窄山梁直下河沿臣等與明亮札商

即令挑撥之兵竟至相近日旁處所暫爲存駐即  
或賊人望見亦不過爲日旁一帶增添兵力諒不  
疑又從宜喜合攻俟新調川兵一至突然往攻自  
能得力其新調川兵據文綬咨稱提督城守各標  
營兵二百名已於二月二十一日自省起程其餘  
亦續至桃關前進並准富勒渾咨稱於後路防守  
將領內派出副將烏林大都司武彭阿等馳赴雜  
谷腦此項兵丁到時卽行帶領前往約計本月二  
十日以前均可前抵日旁臣阿桂以籌辦衝壓攻  
截及兩路合力夾擊之處恐非筆墨所能盡者而

日旁大營與

臣

駐劄之地本可朝發夕至因令明

亮卽日來營面籌一切不過一兩日仍卽速回日

旁趕緊辦理至

臣

阿桂議請調陝甘貴州三省補

缺等兵共六千名原非必欲添於西路惟恐將來

大兵卽從宜喜壓下攻破勒烏圍賊巢而賊人尙

冀稍延殘喘爲退守噶拉依之計則於功噶爾拉

等處另添官兵賊必萬不能支更可速期蕪事均

奏入

諭曰阿桂等奏攻打沿河碉寨並現在籌辦相機采入情  
形所籌甚好又覆奏所以請調陝甘貴州三省官兵之

故惟恐將來大兵攻破勒烏圍賊人尙爲退守噶拉依之計則於功噶爾拉等處另添一路兵丁可卽速期肅事等語此計殊可不必前已屢次傳諭阿桂令將新調之六千兵概行調赴西路軍營分派合剿阿桂處添此兵力自更有益若功噶爾拉等處山險路長雖派五六千兵前往亦恐未必得濟卽官兵攻破勒烏圍之後賊果退守噶拉依阿桂亦當與明亮通計所有兵衆設法分路攻剿或派兵於馬爾邦一帶夾攻引進富德并力剿擊噶拉依或派豐昇額帶兵徑赴喀爾薩爾一路共籌合剿均屬直捷穩妥且俱易於照料何必自外繞赴功

噶爾拉轉置新兵於無可把握之地乎阿桂自當斟酌  
妥辦勿再拘泥前說又據稱南路挑撥之兵於相近日  
旁處所暫爲存駐俟新調川兵全至突然統領進攻并  
稱札致明亮卽日來營面籌一切等語籌畫可謂盡心  
明亮亦奏及此事自應如此辦理至川兵於三月初旬  
可以全赴宜喜其時明亮亦當由阿桂處面商回營自  
應作速相機進攻以期合力集事

二十日

公偕豐昇額 明亮色布騰巴爾珠爾奏言現在賊  
人悉其醜類 於西路并日旁合力死守 臣等揆度

情形於宜喜進攻必能得手一經下至瀕河即可  
與西路官兵合搗賊巢實爲此時最要機宜茲臣  
明亮於初三日來抵西路大營會同酌議查達爾  
圖一道山梁之上從前已駐官兵營卡特因山梁  
南北兩頭賊人尙有堅礮大卡據以死守從山梁  
東西而下雖尙可以穿越林箐繞攻由得楞山腿  
向東南迤邐下行歷至河沿但山溝深濶林箐叢  
長必須接續多兵始能前進是以前次難於措手  
今厚集兵力擬派兵數隊從山梁東西穿越箐林  
一面攻打得楞四礮一面卽步步擊柵越溝直上



得楞山腿之上再由山腿直向東南下壓其達爾圖山梁甲索兩邊賊人礮卡竭力攻打使其中賊人不能他顧而巴舍什礮寨亦派兵前往以防其衝突救援官兵順山腿拏柵而前一至河岸卽直抵對河勒烏圍之西南則沙壩喀爾西以至茹寨沙爾等處毋須節節力攻至南路撥來之兵已於三月初四五日內均抵附近日旁地方而川兵頭起此時亦將抵日旁約於二十左右必能齊集謹將<sub>臣</sub>等會商宜喜進攻之處另行繪圖貼說進

呈<sub>臣</sub>

明亮卽於初六日馳回日旁上緊趕辦至<sub>臣</sub>阿桂

所請陝甘貴州兵六千茲蒙

上諭仍令各督撫等熟籌撥往并據畢沅奏西安兵二千業已陸續起程但此三省兵丁臣阿桂原非請增於西路西路進攻并不俟新兵如其尅日搗巢則此三省之兵卽當遵

旨飛檄停止

公偕豐昇額色布騰巴爾珠爾海蘭察額森特又奏言自勒吉爾博山梁迤邐而下至將近噶爾丹寺又分爲兩道山腿其分支處上爲安吉寨下爲達佳布寨雖亦礮卡聯絡但賊因官兵一於木思

工噶克一於沿河得式梯兩處奮攻是以達佳布賊人備禦稍疎若捨得此兩處則循向南山腿可壓至噶爾丹寺之前循北邊山腿可壓至得式梯之上如兵力有餘並可直取噶朗噶從此直搗勒烏圍更無阻礙而木思工噶克及勒吉爾博並得式梯之賊據守無益勢必不攻自潰但達佳布安吉之下尙有礮卡數處必須一面攻打一面卽從礮卡中間穿越而過始能得手而此一帶山梁於初二三等日大雪幾及二尺許此時山坡陰處未盡消融官兵尙難以措足若輕率進攻稍有阻滯

則此處又爲賊所知當必益加防守是以臣等雖  
心急如焚不敢輕試俟兩三日雪泥稍乾一鼓直  
進其沿河一路所有右手塹上大礮晝夜轟摧此  
時亦當坍塌臣等亦於進攻達佳布之日分兵攻  
打以牽賊勢至遜克爾宗地勢稍低積雪已消臣  
等派普爾普成德哈薩爾圖分爲三路進攻並令  
總兵劉國樑等從右手合攻且截來援賊衆初七  
日卯刻前進賊人當官兵前進之時並不卽爲抗  
拒直至官兵將抵礮下溝邊始突放鎗石如雨而  
下濠溝較舊益加深濶官兵連撲三次不能得手

因將兵丁徐撤

公偕豐昇額色布騰巴爾珠爾又奏言提督常青報稱有小金川會頭溝甲索寨頭人僧格太帶妻子家人等共十四名口從底木達投出解送大營查訊<sub>臣</sub>等逐一訊問伊於三十八年兩金川勾通反叛情事頗得其詳彼時伊雖在登春而伊子阿濟因養傷回至本寨已從賊人打仗搶佔地方及至木果木後路已斷僧格太卽隨逃入金川其家口亦於是年冬官兵收復小金川時逃往今以口食不繼闔家投出等語<sub>臣</sub>等復憶三十八年九月

內賡噶自賊中逃出據稱是年五月溫將軍派令  
伊與楊素卽甲木楚及額魯特空翎護軍巴圖帶  
領鄂克什士兵十二人往曾頭溝放夾壩走至阿  
濟寨上阿濟正在養傷賡噶等不知其已經從逆  
住伊家內是夜阿濟率同三百餘賊圍住寨子將  
巴圖砍死賡噶與甲木楚俱受傷拏去等情當令  
賡噶前來認識則實係從逆之阿濟質之阿濟父  
子均直認不諱並穆塔爾稱伊父鄂伊塔爾結亦  
係僧格太首告被僧格桑殺死臣等詰以爾等父  
子是穆塔爾賡噶讎人二人現在軍營爾等豈不

知從前種種作惡均難掩飾何以敢於投出據供  
如今金川卽日要滅大兵進來拏住勢在必死不  
如投到大營萬一饒恕還可得命因此逃出臣等  
思阿濟從賊戕害官兵核其情罪父子均無可宥  
但現值番人絡繹投出之時若將伊等卽行正法  
恐適以堅其死守因將僧格太一家於附近內地  
屯練地方暫爲安置伊子阿濟畱軍營打仗俟蕩  
平金川之後再爲查辦均奏入

諭曰阿桂等奏明亮於初三日至西路軍營會籌攻壓宜  
喜明亮已於初六日馳回日旁約計二十日左右各兵

齊集即可統領進攻此時正當明亮等進兵之期佇盼捷音至阿桂一路擬於安吉寨達佳布兩處派兵分路攻勦所籌甚好阿桂惟當努力迅辦以副朕懷至於陝甘貴州所調之六千兵自應令其全赴西路合力助勦業已屢次傳諭今阿桂奏如其尅日搗巢三省之兵卽當飛檄停止等語不應如此辦理現在大兵尙未直抵賊巢卽於日內攻克勒烏圍仍須進勦噶拉依將逆酋賊目全行擒捕方能蕪事且阿桂明亮各後路如遜克爾宗榮噶爾博及喀爾西甲索等處未經潰散之賊必當畱兵搜洗淨盡然後可進勦噶拉依而馬爾邦一帶



並須分兵夾擊引進富德共搗賊巢其喀爾薩爾一路  
臨時亦應酌量派兵截擊是勒烏圍得勝以後需兵處  
尙多此六千兵正可資其用俟大功告成再令回營未  
晚何必於此時遽行遣回乎又另摺奏小金川頭人僧  
格太帶妻子家人投出詢明父子情罪均無可宥但若  
卽行正法恐適以堅番人死守之力等語所見非是此  
時官兵將抵賊巢番衆已紛紛投出與去冬情形不同  
無庸復爲招誘卽或疑畏不出亦有何碍況此等助逆  
賊匪敢於抗拒官兵若至我師直搗賊巢時雖出降亦  
不可宥又何在此時必欲其來且僧格太阿濟二犯其

罪惡既已認明不得因其自行投出稍爲寬宥著傳諭  
阿桂將阿濟卽於軍營正法並申其前次從逆謀害巴  
圖等之罪使共知儆戒至僧格太現在安置何處卽著  
文緩派員往彼拏至省城正法其家屬仍賞內地土司  
爲奴

公偕豐昇額明壳色布騰巴爾珠爾又奏言據副  
都統永平等稟稱革布什咱土舍丹津札布於二  
月二十九日病故臣明亮適在西路軍營公同商  
酌查自金川賊酋父子跳梁惟革布什咱土司拉  
旺策布登始終不附爲賊酋所恨至於用計戕殺

奪其印信號紙並將土婦掠去拉旺策布登之子  
諾爾布湛都爾逃出育於其舅霍爾章谷土司處  
年尙幼穉是以前次令其叔丹津札布掌管事務  
該處頭人百姓不忘故土司之子雖有索諾木收  
伊土婦之語而復讎雪恥之心積而愈奮是以從  
前收復革布什咱固皆各頭人從中內應而日來  
打仗亦頗出力今正在派撥革布什咱土兵合搗  
賊巢之際適丹津札布病故而諾爾布湛都爾又  
遠在章谷此時不可無人暫管地方查有革布什  
咱遠族土舍桑金邦及大頭人甲噶朋勒爾悟太

均爲番衆所服因給發委牌令其暫行合同辦事  
併飭其此後派兵打仗倍當同心出力不可稍分  
彼此其諾爾布湛都爾年已十三各番衆是否願  
其承襲之處飭令永平李本等傳集各頭人公同  
定議出結具報再行辦理奏入報

聞

二十七日

公偕豐昇額色布騰巴爾珠爾海蘭察額森特奏  
言勒吉爾博山脊之下尙有小山腿三條賊人各  
設礮寨應分兵攻打始能得手臣等派索倫官兵

及屯土兵練分搶達佳布安吉兩處碉寨又令瑚

尼爾圖等帶兵爲達佳布安吉寨官兵接續其第

三條山腿上有兩碉臣額森特率同總兵仁和攻

搶下手碉座而派副都統額爾特侍衛彰壽攻搶

上手碉座其第二條山腿上兩碉派領隊大臣福康

安佛倫泰侍衛泰斐英阿帶兵攻搶臣海蘭察等

緊隨接應至第一條山腿上共有四碉令總兵保

寧特成額官達色等分攻而保寧等所攻碉座之

上又有寨落兩座派烏什哈達等帶兵分攻又木

思工噶克碉卡派副都統福珠禮倭昇額書麟等

攻打牽綴臣等又以搶佔達佳布安吉寨之兵若  
竟從康薩爾下溝行走不免爲賊所見預爲準備  
當於十一日令由密拉噶拉木之後繞下格魯克  
古左邊溝內卽於是日戌刻從陡崖密箐中潛進  
至十二日子刻木思工噶克高處官兵先已放鎗  
前進以混賊人耳目而進攻達佳布安吉之兵已  
從第二第三山腿賊礮中間攀越而過突然分路  
並攻無不奮勇爭先直入寨內據其一面礮房與  
賊人分頭佔住奮力攻擊時臣額森特等見安吉  
寨火彈已放卽帶兵進抵第三條山腿將兩礮同

時攻得

臣

海蘭察福康安等亦即將第二條山腿

上兩礮攻克賊番均被殲戮其第一條山腿寨落亦經烏什哈達官達色等竭力奮攻將礮座克取殺賊十數名惟是安吉寨本距噶爾丹寺甚近當有賊數百人分爲數起上來救應各官兵向前迎殺賊人捨死鏖戰退而復進者三四次俱經官兵擊敗其山梁之賊又攢集一二百人憑高衝壓官兵弓箭齊發傷斃甚多而賊因達佳布安吉寨爲其心腹之地捨死格鬪並與噶爾丹寺前來之賊上下合衝

臣

海蘭察等星卽帶兵前往接應又有

賊來衝

臣

海蘭察額森特等所得之礮福康安等

往援亦將賊人擊退日已將暮此各山腿形勢延  
長道路崎嶇陡峭且均有深溝林箐間隔賊人從  
中出沒滋擾官兵不及早趕擊木柵石卡難以接  
應遂將所得礮卡拆毀其各路官兵共計此次殺  
賊二百餘名生擒六名並奪得鎗礮火藥刀矛等  
物現在另行相度形勢務爲破其要隘進搗賊巢  
公偕豐昇額色布騰巴爾珠爾又奏言查前此富  
德於南路軍營及吉地章谷等處先派兵三千七  
百餘名調赴宜喜

臣

等審度進攻兵數尙屬不敷



因將所調川省咨回補缺等項官兵三千令其迅  
赴宜喜備用至奉

自續撥南路官兵三千臣等因宜喜兵數已敷是以於本

月初四日咨明富德暫停調撥臣等思宜喜一舉

此時不論何項兵丁總以一經足用立即進攻爲

主今南路續撥官兵三千業於初四日咨令停止

倘其接准咨文即行停撥而以後川兵二千又復

令赴西路則輾轉牴牾於迅速集事之局反多遲

滯當即札覆明亮等以此項川兵此時應儘其遣

赴北路且毋庸別爲改撥以免歧悞應俟南路覆

到再行酌辦今准富德覆稱續撥頭二隊官兵一  
千業已起程三日仍令副都統德赫布等帶赴宜  
喜備用其三隊官兵甫自絨布起程隨卽遵照趕  
回等語是南路續撥宜喜之兵止有一千其川兵  
三千自應全赴明亮處以資應用如果兵數有餘  
再截畱在後一千亦爲便易臣等並已咨明亮等  
查照辦理至所調陝甘貴州兵六千從前原爲功  
噶爾拉當噶爾拉等處另分一路之用當蒙

皇上以事不可行訓示周詳今復奉

諭旨令其全赴

臣

等軍營聽候遣派

臣

等思由功噶爾拉

等處另派一路於安設臺站等事雖非難辦但西路軍營得力之領隊侍衛章京及將領等止有此數分派另路頗費周章而相隔既遠臣阿桂亦照料不及自應遵

旨調赴此路另於附近地方探看道路合力並搗賊巢尤可速期集事均奏入

諭曰阿桂等奏攻打達佳布安吉等處碉寨殲戮賊番情形此次雖殲賊二百餘生擒賊番六名而攻得之碉因難以駐守復行拆毀仍與未得無異殊覺可惜自是兵數不多未能分路截擊之故今陝甘貴州所調兵六千

據各督撫奏均係揀派勇壯者令其遄赴軍營前往西路約計陸續可到阿桂處添此生力精兵聲勢更盛於攻勦尤爲有益自應分路派兵進攻必更易於得手且攻勦之外可派吉林索倫兵預伏中途截殺應援之賊此等賊眾一出碣外已自失其險尤可儘力多殲使之胆落阿桂當努力爲之至明亮處所調南路兵四千又有吉地等處兵七百五十名計將及五千今川兵三千又俱全赴宜喜處若再於宜喜現兵內抽選數千約可滿萬自當急籌攻取明亮現於何日進兵著卽速覆奏以慰懸注但明亮此路進兵係攻其無備果能得勝自

附錄  
屬甚善但究如治病偏方難於實有把握仍當以阿桂處爲正路朕亦惟阿桂是恃不可稍有疎懈

公偕豐昇額色布騰巴爾珠爾又奏言據普爾普等報稱楊素卽甲木楚已同鄂克什番人桑結塔爾綽期甲布番人克特爾均由賊境脫出臣等親加訊問據稱乾隆三十八年五月內將軍溫福派令前赴曾頭溝一帶擒捉賊人其時正值兩金川勾通反叛將伊拉至勒烏圍嗣又送往噶拉依頭人處問話住了一月仍發回勒烏圍伊欲乘間逃走被人首告脚上穿了木靴不能逃脫直至兩月

前懇求頭人當噶拉阿納木將木靴脫去發在廚  
房使喚至本月初十日莎羅奔等俱往噶爾丹寺  
念經就同桑結塔爾等挖開水溝逃出等語臣等反  
覆訊問伊稱自被拏之後總在官寨中住是以雖  
幾及二年而於賊境緊要情形不能深悉惟口糧  
短少一節與逃出諸番所供無異查楊素本係金  
川微末番人又因其在內地日久加以防範且性  
情愚蠢離本地年久與賊人性習已殊其不能得  
知緊要情形似非捏飾查上年九月內兵丁王之  
奉脫出供稱在勒烏圖寨內遇見楊素指引該兵

脫出

臣

等錄供具奏奉

旨楊素尙可憐俟平賊後放出仍予原職今經自行脫出

其意尙屬可嘉

臣

遵

旨照舊給與空翎白頂但伊雖係金川之人而於山川形勢已屬模糊既不足供嚮導之用且軍營通事亦多畱在此間亦屬無益除另派人送京外謹錄供

詞進

呈奏入報

聞

四月初七日

公偕豐昇額色布騰巴爾珠爾奏言臣等於十六

日令海蘭察赴日旁會同奎林和隆武三寶等並  
往宜喜審度情形與明亮舒常覆加籌定核計兵  
力南路處撥兵四千七百餘名又川省新調補缺  
等項官兵屆期可到二千餘名合以日旁宜喜可  
抽之兵四千餘及綽斯甲布革布什咱土兵共計  
有一萬數千名兵勢已極壯盛臣等復恐官兵雖  
多精銳者祇有此數因於西路軍營內挑出勁銳  
可仗之兵吉林索倫六百名貴州二百名屯土兵  
二百名共一千名以爲搶佔扼要地方及截殺采



衝賊人之用商合海蘭察及領隊大臣福康安佛倫泰斐英阿等帶往以資臨時分頭督率於二十一日令此項官兵從密拉噶拉木之後繞至格魯克古山溝暫爲歇息卽於是夜越過格魯克古山梁下山渡河使賊不能知覺現與明亮等約定三四日內合力衝壓必能得手至西路沿河一路日來用礮攢轟其右手田壩上大礮一座已漸次坍塌而木思工噶克丫口原係進搗賊巢正路只須攻開兩三處佔據卽可直下臣等察看情形雖賊人礮卡林立其間尙可設法辦理計至宜喜一

路攻壓之時沿河一帶既當合力進攻而木思工噶克山梁上其防守嚴密之各礮卡必須先爲連日攻打賊人或以爲此不過牽綴之兵未必實力進攻將人撤往河北則可攻之礮卡備禦稍疎即可乘虛攻克臣等並於海蘭察帶兵起身時囑以此次從宜喜術壓直至瀕河爲蕞事遲速攸關倍當努力果能由彼設法渡河抄截則已出得式梯後賊人斷不再守仍與西路會兵速進如不能渡河抄截仍卽速撤回西路爲併力乘機進攻之策公偕豐昇額色布騰巴爾珠爾又奏言賊番狡獪

百出其鬼域伎倆實不可不慎密嚴防但道路之  
遠近形勢之險易與夫賊僮賊目情形投番等知  
之熟悉以爲詢問嚮導之用自不可少且賊衆所  
以死力拒守實因並無退步而又惑於賊僮投出  
要死之語是以爲其堅守若畱此投番數人在營  
使共知其不殺似更足以速渙賊衆之心於大局  
亦爲有益臣等西路於投出番人中察其人尙可  
用而又帶有父母妻子者將其家口安插瓦寺梭  
磨等處以資約束而令該番隨營差遣伊等攜帶  
家口出來自必心生顧戀分置兩處卽有中懷叵

測者亦可杜其狡譎之謀而該番在營又合可信之士弁並飭帶土兵之將領畱心察看情偽易知似尙可無他慮至單身投出無可憑信之人俱交附近內地安插從未令其隨營打仗此不獨於金川番人爲然卽小金川番人之投出者亦一體如此辦理查番人固稱狡詐但其中亦有未可概論者卽如本月十二日安吉等處打仗其爲賊人所截之士弁土兵內次日卽有策旺阿濟商納三人逃出商納被賊趕上殺死策旺本係金川之人久投內地伊被擊至噶爾丹寺賊目以其向爲大兵領

路銜恨甚深痛加捶楚幾於體無完膚而阿濟係小金川頭人僧格太之子木果木失事時曾隨賊衆搶佔地方茲於本月初三日同其父母兄弟投出卽請隨征自効直前打仗殺賊手腕中鎗及被賊擊去仍與策旺從礮跳下逃出此內地兵丁深知大義者不過如此而於旣降復叛旣叛又降之番人較之則其居心真僞實難概論况投番之實心歸順與中懷異志審其神情詞氣介在幾微而在營通事傳言亦難盡信伊等見將軍大人意指稍偏卽將投番言語畧爲遷就因其疑似之間無

難卽指爲奸細是以軍營事務雖繁臣等必將投  
番親爲研訊務得實情今蒙

聖諭諄詳

臣

等惟有益加力究嚴防斷不至墮其術中均

奏入

諭曰阿桂奏挑選吉林索倫等勁銳兵千名令海蘭察福  
康安等帶領前往宜喜以資分頭督率阿桂不分畛域  
派兵往助明亮所見極是但西路兵數亦不甚多今復  
分減千名兵力似覺稍單又海蘭察遇有攻剿之處奮  
勇超羣所向克捷今令前往宜喜於彼處自屬有益但  
阿桂處似覺少一可恃之人至福康安近日頗有出息

亦屬西路得力之人阿桂將伊等派往宜喜必見及宜喜情形爲近日進兵要路故如此調派若果從宜喜壓至瀕河自以設法渡河抄截爲要明亮等久經奏及籌備渡河之事臨時諒必應手誠能抄出得式梯之後與阿桂會兵夾攻則勒烏圍已在掌握之中此舉實爲事半功倍佇聽捷音至另摺所奏籌辦降番之法以畱數人在營使其知其不殺似更可速換賊衆之心固亦是一見解但此輩賊番情形叵測卽或畱其在營亦不可不嚴防密察勿爲所愚而明亮處從未盤獲奸細一人尤恐其爲黠賊蒙混深爲慮念明亮倍宜畱意慎防毋

稍疎忽貽悞至僧格太阿濟二犯罪惡昭著業經阿桂處訊明是以諭將阿濟卽在軍營正法僧格太令文綬拏至成都正法今據阿桂奏阿濟從前雖隨賊搶佔地方茲同其父母兄弟投出卽請隨征自効打仗殺賊因手腕中傷被賊搶去仍從側跳下逃出等語有此一節尙可以貸其死自當暫畱營中阿桂仍畱心防察并觀其向後出力與否再行定奪其僧格太一犯亦可毋庸辦及並其家屬且不必分買土司爲奴統俟將來再辦不遲將此并諭文綬知之

恭錄



御製詩

宿齋宮卽事

星惟辰見月惟陽宮漏聲遲日正長仍似昨年斯望捷

昨歲

考祭齋居時阿桂正當采入擬派兵六路分攻急明捷音之至齋居詩曾及之今歲宿齋宮阿桂奏至現與明亮訂期會剿三四日內卽可進兵冀邀集事阿桂距賊巢咫尺轉瞬搗穴擒渠且與明亮夾攻尤爲事半功倍茲以集勲在邇躬望敢云春雨已占祥每因閒暇廛無逸日奉居捷音更切

諸運有常孰謂值齋方事簡書呈四庫勘猶忙

十七日

公偕豐昇額額森特奏言自三月二十五日至三

十日大雪迷漫不分晝夜至交四月猶復半陰半

晴故木思工噶克山梁積雪未消而遙望宜喜雪  
色更甚惟是山上下雪沿河則雪雨相兼泥濘尙  
屬易乾自當從此先行攻撲不使賊人得以休息  
臣等公同籌議臣額森特率同侍衛伊里布等直  
取羣尼礪寨並合翼長六十七等攻其左遊擊袁  
敏等循田勘而進以攻其右來珠礪寨則令侍衛  
彰靄總兵仁和等攻打又派副都統額爾特侍衛  
那木札等從礪寨中間前進以斷賊彼此來往並  
截殺各處來援之賊其章京納亨保等帶兵爲各  
路接續於初五日子刻同時並進官兵先已攜帶

板片木梯爲度溝上礮之用但寨外溝濠旣濶賊  
又挖掘地窖藏伏其中一見官兵卽從地窖空穴  
內往上擊打使我兵不能鋪板而過其礮寨上賊  
人又合力放鎗抵禦官兵正擬設法上攻而得式  
梯以及各山腿之賊合力來援經額爾特那木札  
等從中衝進直前迎擊殲斃二十餘人賊已從來  
珠寨後竄入死守且又有賊渡河前來接應官兵  
卽施放鎗礮打中皮船賊俱墮水中餘賊亦入羣  
尼寨內一同堵禦官兵攻至辰刻尙未得手久戰  
恐多傷損因令官兵從旁撤下而急令從中施放

大礮其礮寨上放鎗之賊尙在站立抵禦多有被礮擊斃者我兵內副叅領烏爾圖委署叅領六十  
三得有鎗傷查木思工噶克及宜喜山梁但得連  
日快晴卽能從此攻進惟是賊人狡惡異常節據  
投番等稱賊人望見宜喜官兵陸續增添竭力於  
噶拉依等處搜括賊衆前來守禦又因西路大兵  
利害復令山塔爾薩木坦等回來合力把守是賊  
人於此兩路悉心守禦實屬不遺餘力雖賊人所  
備之地非卽我兵攻壓之地於攻取大局毫無妨  
礙但此時更須多方以悞之使其無從揣測則慌

亂自必益甚臣等已令常青旺保祿王進泰抽出官兵於簇拉角克擦爾覺兩路前進相度賊人望見之地多然烟火作爲進攻之狀其南路納木覺爾宗一帶計有防兵三千餘並令侍衛哈青阿於當噶爾拉等處酌量前進一同率綴賊勢則賊會不能不回顧噶拉依而西北兩路併力進攻自可尅期采入再渡河船料臣等前此早經預備因對岸崖礫陡削道路狹窄是以未能辦理今宜喜官兵一經壓至河邊卽當來往過渡需船更爲緊要因將預備船料越過格魯克古山梁擡至河邊成

造使賊人望見又疑官兵或將過河截日旁之後  
或將順流直下相機搶殺更可亂其心目臣等逆  
料賊人必來侵擾飭令官兵預爲設伏防範初四  
日夜亥刻果有二三十賊用船過渡前來官兵候  
其上岸齊出衝擊賊人措手不及敗至河邊有上  
船不及者又復落水淹斃其渡河逃去者無幾土  
兵內惟有受傷二名奏入時色布騰巴爾珠爾已於軍營病卒

諭曰勉力速成功實盼望不安寢食矣

恭錄

御製詩

遣悶

遣悶惟以詩詩亦悶難遣近接軍中報夾攻賊巢剪惟是

甫定期雨雪過爲舛

阿桂與明亮訂期兩路會剿初定三

日雨雪暫阻蓋此次兩軍會攻所關者鉅將軍等之意亦

以泥深途滑兵難措足不得不籌其萬全擬候晴霽相機

速進然功速垂成明望益切矣滑刺難進步無奈待展轉三軍雖奮愾諸

將籌盡善以此弗嚴督閩外聽猷展惟是眇捷音曉夜心

纂纂彼望晴弗晴空勞王臣蹇此望雨弗雨日引慮成曠

以彼而易此兩得功皆歲何時惠其寧吁哉徒毫吮

效仇遠十二辰體咏金川事解悶

有序

近於永樂大典散篇中哀輯得仇遠金淵集有所謂

十二辰體者頗創見可喜惜一詩凡三易韻且鼠牛等字參差用於句中不若鮑明遠數詩之精審余昔效鮑昭體論君道茲效仇遠此體味金川事所用十  
二支字並列句首從鮑法也日來大功將成眇捷益切寢食爲之不安拈翰成此聊以自遣而灌鼠屠豬藉以取譬於施力之易易庶幾吉語自徵耳

鼠寇猖金川於唐吐蕃種牛相却悉坦自昔惡蠢動虎年

卽背盟促浸於乾隆戊辰年平定後至戊寅年其會郎卡卽與革布什咱構衅意圖吞併時督臣開泰提臣

岳鍾璜檄令撤兵弗聽隨調綽斯甲布土兵斷其糧路又

令章谷償拉各兵突出會攻始退兵至丹多焚燒寨落而

同構衅隣封冗

郎卡屢與九土司構怨以番人互相讎殺蠻觸交爭無足爲異且未干犯內地無庸



聲討致罪止令九土司自行合力攻禦九土司者緯斯甲  
布革布什咱巴旺儂拉丹壩與促浸最近鄂克什從鳴克  
梭磨卓克 兔穴營三窟蟻鬪相衝捫龍驤未足勞方伯命  
采稍遠

戒董蛇蝎為其心遷延竟惜惜馬年增築礮壬午歲郎卡  
自知為眾番

所惡佔據各山梁修築堅礮十餘座欲圖出外滋擾尋改  
奪緯斯甲布之俄坡又攻殺丹壩番眾又與三雜谷革布

什咱接仗又吞併心益滿羊子效父觸郎卡既死其子索  
諾木益兌悖頑梗

滋擾巴旺 賊害革布什咱土司擄其婦女佔據其地懲惠儂拉土舍

僧格桑攻圍鄂克什經督臣阿爾泰提臣董天弼同往飭  
諭僧格桑稱愿退地釋兵辛卯夏儂拉違背前約復攻鄂

克什兩逆酋遂相聯合狼狽為奸且侵明正土司寨落並  
添築礮卡負隅抗拒其罪實

難再追不得不加以兵力矣 羸角曾弗恐猴譎不可赦王

師發精勇雞助非所圖羣番籌安鞏狗苟與蠅營壓卵山

臨聳 阿桂駐兵康薩爾距勒烏圍不遠現擬同明亮

訂期分路夾攻尅日掃穴擒渠佇見膚功迅奏 豬韉

羌兒俘成功不旋踵

公偕豐昇額又奏言德爾格忒土司魯珠布嘉木  
差於上年十一月病故茲據已故土司之妹洋湛  
卓爾瑪遣其頭人來營稟稱土司兒子年甫八歲  
尙須等待數年方能管事土司在日一切事務俱  
與洋湛卓爾瑪同辦是以此時大小頭人百姓公  
同商議仍願洋湛卓爾瑪護理臣等向知該土女  
自小爲尼並無夫家歷來協同土司辦事已久實  
衆番所服現在宜喜一路運糧烏拉大半取給於  
德爾格忒今已故土司之子年幼不能管事自應

令該土女暫行掌管俟土司之子年歲長成再行  
照例襲職臣等與明亮等彼此札商意見相同當  
經給與護理執照並飭其各安住牧遇有運糧等  
事照舊實心出力不得稍有遲玩奏入報

聞

二十五日

公偕豐昇額額森特奏言宜喜進攻一局爲此時  
緊要關鍵必須木思工噶克及得式梯兩處同日  
攻打賊人始不能撤堵西路之人以爲接應宜喜  
之用而卽就西路中又須連日攻打賊人或以西

路進兵不過爲北路牽綴一次攻搶未必復行大舉不無意存疎懈然後木思工噶克卽於次日進攻可望攻克至勒吉爾博山梁自上而下過木思工噶克丫口又有突起一峯上有木城一座大礮三座互爲犄角一得此處則其山脊之各礮卡固可順梁下壓而且俯瞰木思工噶克丫口礮柵鎗礮轟擊賊必不能據守臣等於十三日派令福珠禮等攻榮噶爾博下面木城書麟格勒爾德等攻木思工噶克丫口礮卡又派副都統額爾特侍衛那木札等攻羣尼正面礮座侍衛巴三泰等從旁

攻打各於宜喜官兵未經動手之先並進攻撲賊人放鎗滾石死力抵禦而勒吉爾博山梁及沿河一帶之賊齊來救援並從各礮柵後竄入合同固守官兵攻至辰刻始行酌撤是日臣阿桂即將攻打木思工噶克丫口官兵部署派烏什哈達瑚尼爾圖等攻搶丫口山峯木城礮座副將曹順等攻取山峯右手礮座侍衛穆哈納等攻取山峯左手礮座其副都統福珠禮倭星額書麟總兵特成額海祿等帶兵爲各路接應其總兵官達色劉國樑烏爾納等截殺各處來援賊眾而富興保寧等攻

打勒吉爾博山梁中間塞古羅木碉寨以爲牽綴  
並預備木植一俟官兵得手趕擊木柵臣豐昇額  
額森特亦於是日將沿河官兵部署臣額森特同  
侍衛那木札等攻搶羣尼碉寨副都統額爾特侍  
衛彰靄等從左合攻總兵仁和攻打來珠寨落副  
將西德布等從旁攻打遊擊靈山等攻打沿河各  
寨均於十四日子刻前進臣阿桂豐昇額分路督  
率調度其攻打木思工噶克山峯各官兵烏什哈  
達等潛密前往攀越而登賊衆放鎗外擊其三面  
碉內隨卽合力抵禦鎗石齊發遊擊梁朝桂等先

搶東北隅大戰礮一齊擁入其叅將國興等督兵擁進木城並用刀斧砍開數處衝入勦殺亦將木城攻獲維時呼聲四合兵氣益揚穆哈納等將山峯左手礮座曹順等將山峯右手礮座同時攻克所有攻得之木城石礮內賊人被官兵殲斃者甚多並割取首級耳記及奪獲烏鎗刀矛等物其餘官兵卽從康薩爾直至丫口山峯一帶連擊木棚佔據至攻沿河礮寨之兵均攜帶木柴堆積於羣尼寨下放火焚燒火勢延入寨中賊人多被燒斃官兵正欲乘勢撲進而礮寨兩旁及礮後田礮之

下所有潛伏賊衆俱來援應且寨內烟燄飛騰官兵亦難撲進因將官兵酌撤至北路官兵先於十二日進攻甲寨搶獲大礮九座石卡一座且宜喜山梁於十三日望見攻克得楞礮卡已至沙爾尼之上本日復見一隊官兵向東從薩克薩谷而下已可直至河沿與西路現攻之地隔河相對所有自日旁沙壩以及喀爾西斯牟木咱爾等處四條大山腿四道深溝其間寨落賊人皆已不戰而逃現在官兵所佔之沙爾尼山梁下至勒烏圍對河臨岸其間亦無險阻日內諒可歷下至西路本離



勒烏圍甚近只因勒吉爾博山梁既險而礮卡稠  
密更屬異常幾於無可著手今已將丫口右手高  
峯礮棚佔據則攻取得式梯噶爾丹寺以上各處  
皆係從山梁而下較之仰攻者究易爲力而我兵  
既佔丫口右手高峯其丫口正路上雖有賊人礮  
卡將大礮運往轟推不難克取一得此數處礮寨  
竟可直壓勒烏圍奏入

諭曰阿桂等奏分攻噶爾博下面木城又攻克木思工  
噶克丫口礮座官兵卽從康薩爾直至丫口一帶山峯  
連擊木棚佔據至北路明亮之兵先於十二日進攻甲

索搶獲礮座一日而收三年未竟之功將軍等調度有方將領弁兵俱實心奮勇甚屬可嘉所有阿桂豐昇額等及在事出力之將弁兵丁俱著交部查明議叙其尤爲出力之三等侍衛穆哈納叅將國興遊擊梁朝桂俱著加一等卽行陞用

恭錄

御製詩

將軍阿桂奏報攻克木思工噶克丫口等礮柵詩以

誌事

自報克獲康薩爾頓兵三月未能進雖時斬勦賊小創以

近巢穴守愈峻定計兩路爲夾攻宜喜下壓乘其釁

阿桂自攻

得康薩爾以來雖屢籌進剿時有斬獲但賊人因距巢益近竭力死守未能卽克因計宜喜一路有可乘之隙約明亮至軍營面商乘賊人不備由山梁下壓可收夾攻之利因於南路抽兵四千七百又添派川兵二千阿桂亦於西路選兵一千令海蘭察福精兵旣益調遣定爰趁天晴人康安帶往俾資合剿之力

奮迅了口爲賊境咽喉未因宜喜潛抽引而我將率鼓敵

愾直冒烟火無回吝三面險碕一時奪

軍營自三月下旬以來雨雪彌漫直

至四月初十始得晴霽山梁積雪已消明亮定期十二三等日進攻而阿桂以進攻宜喜之局爲此時緊要關鍵必須木思工噶克及得式梯兩處同日並攻賊始不能抽掣堵禦因派將領帶兵分路進攻十四日子時烏什哈達率兵潛至木思工噶克了口超越而登賊以此地爲咽喉要處並未潛抽此處賊人以防北路宜喜之兵一見我軍卽鎗石齊發力爲抵禦遊擊梁朝桂先搶東北隅大礮攀援而上官兵隨毀其礮根擁入參將國興督兵躍入木城並

用刀斧砍柵衝入維時我兵呼聲四合兵氣益揚待衛穆哈納副將曹順將山峯左右之礮同時攻克其中所有賊眾殲斃甚多官兵自康薩爾至山口連擊木柵佔據其攻打沿河各寨之兵攜柴前往堆積羣尼寨下放火焚燒延入寨中賊眾燒斃從此至噶爾丹寺可從山梁徑下並可直壓勒烏圍阿桂奏謂一日而收三年未竟之功爲之欣慰即敕自此下壓勢應順西路捷實賴部議叙

天佑更稱望見北路近得楞礮卡已攻獲薩克薩谷下一瞬阿桂並稱北路官兵先於十二日進攻甲索搶獲大礮一石礮九並於十三日望見攻克得楞礮卡向東南已至沙爾尼之上又見有一隊官兵向東從薩克薩谷而下已可直至河沿所有日旁沙壩及喀爾西斯牟木咱爾等四處山腿四道山溝寨落賊人似已不戰而逃由彼至勒烏圍對河臨岸其間已無險阻計明亮奏摺亦日內可至一日所收三年功佇待明亮報實信

副將軍明亮奏報攻克宜喜甲索等處礮卡詩以誌

事

去年宜喜據山梁

昨歲七月明亮自絨布寨移兵欲赴西

路協勦道經綽斯甲布境出其不意攻

克宜喜山梁據賊要隘惟因去路綿長官兵未進都因去

不敢繞截隨改路由達木圖進攻未能采入

路長增調官兵足供用更相籌畫總舒良

圖屢籌進勦賊

眾守禦更力且於達爾圖山梁下掘濠阻官軍進路復稽

時日阿桂因籌議賊中形勢為仍當由宜喜一帶相機即

進並請多撥勁兵供用使之迅速集事阿桂惟以國家軍

務為重實心運籌不分畛域其心足嘉會傳旨獎諭之

日旁別綴聊虛擲

南川及吉地等抽調官兵四千七百餘

再就宜喜等各營原有兵抽撥約可滿萬明亮遂於宜喜

一路董率前進其日旁一帶仍駐兵在彼常作攻勦之狀

以牽綴

甲索先攻且試嘗

明亮既與阿桂訂期夾擊因思

賊勢

遂令總兵敖成督兵直入上日清晨連破賊人要隘之礮

又搶佔左右兩山賊礮七座已刻以後將接連俄城之東

賊礮四座亦經佔據鼓勇遂教分隊入翦兇都勵一心強礮平柵克

力羣奮訊執醜擒氣越揚甲索既已得手宜喜一路更覺

一帶山岡綿延二十餘里其上礮卡甚多因派科瑪阿爾

都等為兩支分取得礮又派三寶和隆武奎林珠爾

格德阿滿泰等五隊分取得礮南峯頭所有之礮其向東

山脚則令福康安等往攻十三日黎明各官兵呼聲四起

奮勇爭先賊人鎗礮齊發疾如閃電三寶等六隊官兵各

將所指之礮先後攻克福康安亦捨奪石卡三座統計殲

賊二百餘生擒者七官兵乘勝齊兵擬下壓截前料賊即

各將所得之地嚴行守禦未定無險可恃之際催集新到

奔忙明亮奏擬賊人立脚未定無險可恃之際催集新到

立見竄散即沙壩喀東西之賊兩軍會合指旦晚眾志歡

呼益屢獲三捷勒烏圍最近已可下壓噶爾丹寺直搗勒

烏圍及噶拉依并擒索諾木等當三次報紅旗第一到先

捷而克勒烏圍之紅旗當第一先到也

阿文成公年譜卷十四

望

公又奏言伏查賊酋等死亡在卽尙復竭力負隅  
苟延殘喘則於噶拉依一帶仍圖死拒亦難謂其  
必無此心但此次噶爾丹寺念經據投番等供稱  
索諾木卽到該處而噶拉依已遣頭人丹巴促令  
土司回去則其不敢輕離巢穴似屬實情至欲哀  
聚口糧以爲堅拒數年之計則揆其力量斷不如  
此卽如賊人上年曾將各處田畝盡行種植而去  
秋所收用至本年正月已漸短少况自去年夏秋  
以後官兵節摧要隘賊酋盡其醜類悉力拒守卽

婦女亦皆派令挖濠運石所有地畝不能全行墾種此時登高而望賊境情形歷歷如繪其可耕之地未經翻種者甚多况南路之馬奈卡卡角各寨西路之格魯瓦覺作固頂一帶地方均爲官兵所得而其各寨番民除殲斃投降外仍復逃歸金川又加以小金川逃往番民爲數尙多人多於昔地少於舊且又所種無多安得久資口食據投番等供稱土司官寨內糧食亦已缺乏此卽官兵攻得勒烏圍後賊酋又欲於噶拉依多造堅礮扼塞隘口而無從哀聚口糧自難爲久拒之計若西北兩



路大兵攻得勒烏圍勢必如三十七八兩年進勦  
小金川時一得美諾則底木達布朗郭宗俱成瓦  
解賊酋等卽退守噶拉依亦不過苟延旦夕查三  
十六年小金川攻圍鄂克什達木巴宗官寨該土  
司所以固守數月者蓋因阿爾泰先經派令屯兵  
五百又運存糧五百石幫同戍守且知甲金達巴  
朗拉各處皆有官兵攻打外援可恃而小金川又  
無大礮因得以支持日久今官兵一抵噶拉依賊  
人並無外援而官兵趕鑄大礮不日可成用以轟  
打賊巢萬不能更爲抵禦但此時各路滿漢官兵

共計七萬有奇所糜帑項實屬浩繁是以臣於受傷養病官兵一時不能速愈者隨卽遣回以節糜費今官兵一抵噶拉依則各路官兵均可同時會合除分兵四出將各處大小碉寨盡數掃除外所存噶拉依一隅卽有一兩月稽延誠如

聖諭亦無須多兵圍守臣屆時一面圍攻一面卽將可撤之兵先行陸續撤回不但可以節省軍需而於勝兵凱旋之時亦不至擁擠奏入

上是之